



WANTOK

Great Quality

Affordable Price



NIUSPEPA BILONG YUMI OL PNG STRET!

Wan Wik, Novemba 3 - 9, 2005

NAMBA 1633

K1.00 long Mosbi tasol - Ausait Mosbi K1.30



**PES 3: Ol Australia
tama laikim ol
Pasifik wokmanmer!**


**PES 16,17 - WOL NIUS:
Hevi bilong
pisin sik**

WOK PAINIMAUT KIRAP

LONG POGERA BIRUA

"Lo bai go het na husat
man i brukim lo bai kisim
mekimsave" - Polis
Komisina Sam Inguba

Moa stori long Pes 3....



Soim strong
bilong infomol
Sekta - PES 2



The 4 elements of nature...just became 5
HILUX The 5th element

Toyota combines the
4 Elements of nature
to produce an all new
powerful vehicle

Ela Motors



TOYOTA (S)A (P) (C) LTD
AVAILABLE AT ELA MOTORS 15 BRANCHES NATIONWIDE

Japan na PNG i gutpela poroman

Veronica Hatutasi i raitim

....Ambaseda Yamashita tok gutbai

WOK poroman namel long PNG na Japan bai go strong moa long ol yia i kam na Japan i kamap namba tu tasol bihain long Australia long sait bilong givim helpim na baim ol samting we PNG i wokim.

Ambaseda Katsuo Yamashita husat i bin makim gavman bilong Japan long PNG long las tupela yia na 8-pelamun i tok long gutbai bung long Pot Mosbi long Tunde nait.

Moa long 100 pipel i gat long em Praim Minista na Gren Sief Sir Michael Somare, Gavana Jenerel Sir

Paulias na Ledi Kaludia, Deputi Praim Minista Sir Moi Avei, Foren Afeas Minista Sir Rabbie Namaliu na meri bilong em, ol nara-pela bikman long gavman, ol bosman bilong ol Hai Komisnin na Embasi, ol poroman na ol arapela bik manmeri i bin kamap long tok gutbai bung long Ambaseda Yamashita husat bai lusim PNG tumora bihain long gutpela wok em i mekim klostu long tripela yia.

Ambaseda Yamashita i autim bikipela tok tenkyu long PNG na pipel i karamapim ol lida long

top level, ol gavana na ol grasrut long soim em gutpela pren pasin taim em bin mekim ol wok raun bilong em insait long 16 provins taim em i stap long kantri.

Long klostu tripela yia bilong Ambaseda Yamashita long PNG, planti bikipela na gutpela wok i bin kamap wantaim mani helpim bilong Japan gavman.

Sampela ol bikipela projek em Projek long helpim ol brotkas masin bilong NBC insait long kantri, projek long helpim ol edukesen ikwipmen long Goroka Yunivesiti na projek long stretim rot na bris

long Hailans Haiwe. Em bin lukim tu 43 helt, edukesen na komyuniti projek i kisim helpim aninit long Gren Asistens long Grasruts Program.

Sir Paulias i bin makim kantri long tok tenkyu long Ambaseda Yamashita long strongim moa yet wok pren namel long PNG na Japan na bikipela helpim Japan i givim long ol wok developmen, Invesmen, tred, rises na moa.

Japan em i save baim moa samting long PNG inap long K792 millien na em i kamap namba tu tasol long Australia.



TOK GUTBAI: Ambaseda Yamashita wantaim ol top lida bilong PNG, Praim Minista Sir Michael Somare, Deputi Sir Moi Avei, Foren Afeas Minista Sir Rabbie Namaliu na misis bilong em na Gavana Jenerel Sir Paulias na Ledi Kaludia. Foto: Nicky Bernard

PALAMEN NIUS

Yuni laikim wok painimaut long TST paia

Natasha Bodger i raitim

OL MEMBA bilong Palamen i laikim wok painimaut i mas kamap long bikipela paia we i bin kukim bikipela stoa bilong TST long Boroko las wik Fraide. Carlos Yuni, Gavana bilong Wes Sepik i tromoi dispela toktok long Tunde long Palamen na tok dispela kain paia we i wok long kamap nating nating em i no stret long wanem dispela i no namba wan taim bilong wanpela TST stoa long paia.

"Mi wok long saspek long ol kain kain paia we i wok long kamap insait long Mosbi na tu paia i save bagarapim ol stoa gut tru na nogat wanpela samting i save stap.

"Dispela paia we i bin kamap i stat long olupela stoa na kukim olgeta samting insait bipo i kalap i go long nupela stoa bilong TST yet we ol wokman i wok long wokim yet." Mista Yuni i tok. Minista bilong Inta Gavman Rilesens, Sir Peter Barter i tok ol wok painimaut i wok long kamap yet na ol i wetm inap Paia Sevis i givim tok orait na ol bai toksave long Palamen na pablik.

Painim rot long daunim bensin prais

Stephanie Gimo i raitim

GAVANA bilong Morobe Luther Wenge i askim Minista bilong Petroleum na Eneji na Deputi Praim Minista Sir Moi Avei long awanem as tru na prais bilong bensin, wel na zum i go antap tru.

Mista Wenge i tok bilong wanem Papua Niugini wanpela kantri we i save kamapim na salim krud wel tasol prais bilong dispela ol samting i wok long go antap yet.

Em i askim long wanem as tru na gavman i givim bikipela kontrol long Interoil husat i lukautim ol wel na bensin insait long kantri.

Sir Moi Avei i bekim na tok olsem prais long wol maket i save mekim prais bilong wel long kantri na i no Interoil i save makim.

Em i tok klia olsem PNG bai salim ges i go daun long Australia long skelim pasin strong bilong em. Sapos i nogat gutpela strong, bai ol i lukluk long salim i go long ol arapela kantri olsem Saina.

Gavana bilong Madang, James Yali tu i bin tokaut olsem ol manmeri bilong Madang i wok long bel kros tru long wanem Interoil i wok long pulamapim bensin i go insait long ol liklik kontena na salim long ol. Sir Moi i bekim olsem dispela we ol i wok long pulapim petrol long ol liklik kontena em wanpela eksasais we Interoil i wok long karim aut long halivim ol pablik long noken painim hevi long taim ol i baim na yusim petrol.

Infomel Sekta So kamap gut

....Salim buai i no infomel sekta

Elizabeth Solomon-Babate i raitim

PLANTI hevi long lo na oda na raskol pasin i kamap bikipela long Mosbi siti na planti gavman na non gavman ogenaisesen grup i wok long painim kain kain rot long daunim dispela raskol pasin.

Wanpela rot we komyuniti Jastis Liesen Yunit (CJLU) bilong Lo na Jastis Sekta Program i kamapim em long wok patna wantaim NCDC na ol arapela NGO long kirapim Infomel Sekta Skills Ekspo o so.

Namba tu so i bin kamap long las Fraide inap long Sande long Mari Bareks Ovel na i bin winim nambawan ekspo i bin kamap long dispela yia tu.

As tingting long dispela so em long bringim ol vokesenel na teknikel trening na soim wanem kain skul na samting ol save lainim long skul na painim wanpela

hap we ol i ken maketim ol dispela prodak long kisim mani long em.

Planti rises i soim olsem raskol pasin i kamap bikipela bikos i nogat planti wok long siti na planti yangpela man i nogat potnait wok i go insait long pasin raskol bilong kisim mani.

"Tasol mipela i laik strongim as tingting bilong dispela infomel skuls sekta ekspo olsem rot na mani i stap long infomel sekta. Na Infomel Sekta i no buai na smok. Mipela i laik promotim wok trening skills ol yangpela i save kisim long ol vokesenel na teknikel skul. Dispela trening em bun bilong yumi PNG. Orait, bihain long kisim skul, mipela painim ples maket na givim sans long ol long maketim ol samting ol i lainim long wokim. Na dispela i ken skulim ol arapela PNG manmeri long gutpela trening i stap bilong kirapim na developim komyuniti," Rodney Kameata em bosman bilong CLJU i tok.

Wanpela samting we i mekim dispela ekspo i kamap gutpela tru em talen so na planti vokesenel na teknikel skil trening husat i no bin kamap long namba so i kam insait. Long raten so, i gat ol musik atis, ol musik ben na grup i raitim kamap ol singsing we i sut long as tingting bilong dispela ekspo na daunim lo na oda hevi insait long Mosbi na kantri.

Mista Kameata i tok amamas long wok bung wantaim Ginigoada, NCDC na Teknikel na Vokesenel Edukesen Trening long strongim wok bilong infomel sekta na kirapim dispela ekspo.

Moa long 500 pipel i bin go insait long Mari Bareks Ovel na lukim dispela tred ekspo na baim ol samting we ol skills trening grup i salim. Sapos yu laik putim oda long ol stail sia, tebol, siso o kisim skul long wok agrikalsa na narapela trening, yu ken toktok wantaim ol opisa bilong CJLU o yu ken toktok wantaim ol skills trening lain long stretim wari bilong yu.



Boroko TST paia gen

Philip Kepson i raitim

OL BISNIS insait long Boroko long Pot Mosbi i bin stop wok las Fraide bihain long wanpela bikpela TST stoa i paia.

Sief Paia Opisa Isaac Sailas i tok olsem em i no nap long tok stret wanem samting stret i wokim na paia i kirap inap ol i karimaut wanpela wok painimaut long em.

Ol lain husat i bin lukim paia i kukim i tok olsem ol i ting paia i bin kirap long asua bilong pawa yet.

Wanpela bikman i tok olsem Mista Sailas na ol wok man bilong em mas kisim bikpela tenkyu long hat wok ol i putim long kilim dai paia bai ino nap long bagarapim ol narapela stua i stap klostu long TST.

Dispela dabel stori bilding i stap klostu long ol narapela bikpela bilding na bisnis olsem beng na ol opis olsem Brian Bell, Westpac na ANZ beng. em namba tri stoa bilong TST long paia. Ol narapela TST we bin paia pinis em long Tokarara na Waigani.



BAGARAP: TST stoa paia i pulim planti pipel i lukluk na wok i bin stop tu. Foto: Philip Kepson

Tapiok projek long Saroakeina

Salome Vincent i raitim

WANPELA tapiok projek bai go het wantaim moa long K80 milien bai kamap long ples Saroakeina insait long Rigo distrik, Sentrel provins.

Ol papagraun bilong Saroakeina long dispela wik i sainim wanpela MOU wantaim Sentrel Provinsel Gavman long Sentrel Provinsel Gavman hetkota long makim tok orait bilong ol long givim graun long go hetim dispela tapiok projek.

Kampani bilong Korea em Changai bai go pas long karimaut dispela projek.

Dispela US\$26 milien (K80,246,913.56) projek na kontrak wantaim ol papagraun bai go inap long 40-pela yia olgeta.

Dispela Tapiok Projek em bilong kisim etenol wel bilong mekim ol samting olsem bio-diesel na gas.

Gavman i laikim Saroakeina na Bore distrik long mekim dispela projek long wanem graun bilong ol i gutpela. Saroakeina yet i givim 3,248 hektas long graun bilong ol.

Ol papagraun bilong Bore i no bin stap long sainim dispela MOU, tasol ol i bai stap long wik i kam bihain long mekim dispela.

Minista bilong Lens na memba bilong Abau distrik, Dokta Puka Temu i givim bikpela tenkyu long ol papagraun long givim graun bilong ol long han bilong gavman na Changai Kampani long mekim dispela projek.

Sekreteri bilong Tapiok projek long Saroakeina, Dere Mogaratau i tok, em i bikpela de bilong ol manmeri bilong Saroakeina long wanem em i bilip olsem dispela projek bai kamapim nupela sindaun long ples bilong ol.

Noken baim stil samting

Stephanie Waide i raitim

ASKIM i go long pablik long noken baim ol samting ol man i stilim na salim long strit. Na tu, long wok wantaim polis long daunim long na oda hevi long siti.

Long wankain taim tu, askim i go long pablik long makim seksen na lot namba long ol haus bilong mekim isi wok bilong ol polis taim hevi i kamap.

Bosman bilong ol polis long Nesenel

....Makim ol haus

Kapitel Distrik Tony Wagambie i wokim dispela toktok i go long pablik bihainim kriminel, stil pasin na holim ap ol ka na stilim i go antap moa long Mosbi siti long dispela taim.

Mista Wagambie i tok, ol manmeri husat i wok long baim ol stil samting long strit i wankain olsem dispela man husat i stil.

Mista Wagambie i tok pasin bilong haitim ol raskol na ol stil samting

i wanpela samting tu we polis i makim long stopim.

Em i tok ol polis na ol pipel i mas wok wantaim long daunim raskol pasin long siti.

Long wankain taim tu, ol polis sekta patrol i kisim ol nupela ka long helpim karimaut wok insait long siti. Ol bin lonsim ol nupela ka tasol ol i stap yet long Boroko polis stesen bilong ol long stretim ol eria we ol bai yusim ol

long en.

Mista Wagambie i tok dispela ol ka bai go aut long strit taim ol i putim redio long ol.

Em i tok ol i katim NCDC i go 4-pela hap long polis bilong lukautim na long wanwan bilong dispela hap, ol i katim i go daun long narapela 4-pela hap gen.

As bilong dispela, em long mekim isi long luk-save husat i stap long wan wan hap bilong NCDC. Na tu, i ken mekim isi long patrol long ol ples insait long

NCDC.

Mista Wagambie i askim ol manmeri bilong siti long makim seksen na lot namba bilong ol haus bilong ol na i ken mekim wok bilong ol polis isi long painim haus hariap taim trabel i kamap na ol i singautim polis long helpim ol.

Mista Wagambie i tok aut tu olsem, ol polis i painim 6-pela saspek husat ol i bin brukim NCD Siti Hal husat i bin brukim opis las mun na stilim moa long K20,000.



Air Niugini Toksave

Festive season travel advice

- > Purchase your ticket by the stated payment deadline
- > Ensure to advise phone contact details in case of scheduled changes
- > Check the flight times and dates on your ticket
- > Reconfirm your travel at least 3 days prior to your travel date
- > Your check in baggage weight is 16 kgs per person
- > Cabin baggage is restricted to one piece weighing 7kgs per person



- > Be at the airport at least one & a half hours before departure

Be a wise traveller!

Tabago Katolik opim wan milien kina sios

Aloysius Laukai
i raitim

OL Katolik pipel bilong Tabago Peris long Buin, Saut Bogenvil i bin wokim bikpela amamas long opim nupela na bikpela haus lotu we i wjnim 33 krismas long bungim mani long em na kos-tim milien kina long sanapim.

Ol i bin sanapim haus lotu ya wantaim mani inap olsem K1milien.

Ol pipel bilong Tabago Peris i bin statim fan resing bilong sanapim nupela haus lotu pastaim long Papua New Guinea i kisim Independens long yia 1972.

Na em i kisim 33 krismas olgeta long mekim driman bilong ol i kamap tru.

Man i makim Papa

...Bungim mani long 33 yia

Santu long PNG na Solomon Ailan, Nunsio Adolfo Titi Yalana i bin opim dispela haus lotu.

Nunsio Adolfo i bin tok amamas long pipel bilong Tabago Peris long dispela bikpela wok ol i bin mekim long sanapim haus lotu ya.

Em i tok haus lotu i soim bilip bilong pipel bilong God.

Nunsio i bin tokim ol pipel long yusim haus lotu long olgeta de na nait na i no long Sande tasol.

Em i tokim ol tu long strongim moa ol yangpela long holim pas bilip bilong ol.

Taim em i blesim dispela nupela haus lotu, Nunsio i bin blesim tu ol pipel bilong Tabago Peris

long go hetim gutpela wok bung bilong ol.

Opening long Tabago Haus lotu i bin lukim gutpela wokbung namel long tupela lain pipel.

Ol lain i bihainim nupela Otonomes Gavman bilong President Joseph Kabui na ol lain Me'ekamui bilong leit Francis Ona.

Ol lain Me'ekamui i bin lukautim sekyuriti long taim bilong bikpela bung na selebresen i bin kamap gut olgeta.

Dispela haus lotu em wanpela kamda bilong ples yet i bin droim piksa long en na em i go pas gen long wok wantaim ol kamda long sanapim sios bilding.

Haus lotu i gat ples bilong ol Kwaia i singsing



MILIEN KINA SIOS: Insait long nupela sios i lukluk i go long hap bilong kwaia antap. Hatwok na bilip bilong pipel yet i kamapim dispeloa gutpela na bikpela sios.

na bikpela tawa we i gat bung projek wanpela belo bilong sios i stap komyuniti i bin kirapim long en. Em i bin wanpela long ol bikpela wok long Bogenvil bihain long bikpela pait long ailan.

Wakunai
bisnis man
panim birua

Aloysius Laukai
i raitim

WANPELA bisnis man bilong Wakunai insait long Sentrel Bogenvil i wok long kamap orait bihain long em i bin painim birua long kar bilong em long wiken.

John Vianey i bin ron abrusim rot long hap bilong Vito namel long Wakunai na Arawa long las wik Fraide nait.

Ripota bilong Wantok Niuspepa long Bogenvil i bin kamap long ples em nupela Toyota Lenkrusa i bin pundaun long en long Fraide nait na kisim poto.

Niusman i bin wok long go long Buin na painim dispela lain i bagarap long rot i stap.

Ol lain i lukim birua i bin tok olsem draiva yet i wok long ron spit i kam olsem long Arawa na lusim kontrol long ka na go inset long wanpela bikpela baret.

Ol i tok olsem draiva tasol i bin kisim sampela bagarap long het bilong em na ol i kisim em i go long Arawa haus sik long Fraide nait yet.

Na long Sarere moning ol i kisim em go long bikpela Buka Haus sik.

Ripot i tok olsem draiva i wok long kamap orait nau long Buka haus sik.

Ripota i no bin nap long kisim sampela ripot i kam long Bogenvil polis long dispela birua.


Air Niugini
em i PNG!

Air Niugini Toksave



Itambu tru long salim na baim tiket bilong narapela man.
Yu noken kisim balus wantaim tiket bilong narapela man.
Sapos yu holim tiket bilong narapela man Insurance i no inap long karamapim yu.
Ol wok man long ples balus bai askim yu long ID card long soim olsem tiket em i bilong yu.
Ol i ken kotim yu na yu ken kisim bikpela hevi aninit long lo.

Tingim gut taim yu laik kisim balus!

Lukim Air Niugini Sales lain or Travel Agent.



EASIPAY BAI KAMAP LONG LAE LONG STAT LONG MUN NOVEMBA, 2005

PNG Power i gat gutpela nius bilong ol manmeri i stap long Lae, Morobe Provins.

Nau yu ken kisim gutpela sevis bilong Easipay Mita olsem ol manmeri insait long Nesenel Kapitel Distrik, Rabaul na Buka long stat bilong mun Novemba 2005.

Easipay em i wanpela Yusa Pei Sistem we ol konsuma o kastoma i ken baim ol yunit bilong pawa long yusim.

Ol gutpela samting long dispela Easipay Sistem em:

- Nogat moa diskoneksen
- Nogat moa pawa bilong baim
- Yu ken makim hamas man i laik baim pawa long en na
- Yu ken kontrolim hamas pawa yu yusim

Long yusim dispela sevis, ol pawa kastoma i mas stretim olgeta pawa bilong dinau i stap yet. Mipela i ken katim pawa long ol akaun we i abrusim taim bilong stretim ol dinau.

Ol konsuma o kastoma husat i gat ol ilgel koneksen o koneksen we i no bihainim lo o husat i bagarapim Kredit Mita bilong ol long kisim fri pawa i mas aplai long kisim gutpela koneksen, sapos nogat, bai mipela i katim tu pawa saplai bilong ol.

Wokim stretpela pasin na amamas wantaim Easipay.

Sekim Post Courier na National Niuspepa long wanem taim bai ol Kontrakta i kam long hap bilong yu long putim ol Easipay Mita long haus bilong yu.

Long kisim moa toksave long Easipay, pls ringim PNG Power Ops long Lae long Telepon namba 4724410.

Toksave i kam long
PNG Pawa Pablik Rilesens
Easipawa - Easipay



TOKSAVE I GO LONG OL PAWA KASTOMA LONG LAE

Rot bilong yusim Easipay mita bilong yu - Em i isi tru

- Luksave gut long Easipay mita namba bilong yu, we i stap daunbilo long han sut o rait han sait bilong mita bokis bilong yu. Dispela bai halivim yu long baim Easipay risit bilong yu.
- Long baim risit, go long Easipay opis i stap klostu long yu, em nau bai PNG Power Ops long top taun. Givim mita namba bilong yu long ol na amas mani yu laik baim pawa long en.
- Kesia bai printim Easipay risit we i soim olgeta samting olsem nem na mita namba bilong yu. Yu mas sekim gut risit pastaim long yu lusim ples yu baim risit long en.
- Kisim Easipay risit bilong yu i go long haus na presim dispela namba long risit i go insait long mita bilong yu - Em i isi tru.

Bai yu kisim moa toksave taim PNG Pawa i putim Easipay mita long haus bilong yu.

Toksave i kam long
PNG Power Pablik Rilesens
Easipawa - Easipay

Ol ples lida long Wau/Bulolo sapatim gutpela sindaun

Elizabeth Solomon-Babate i raitim

OL komyuniti lida insait long Wau/Bulolo distrik i wokim ol tok promis long sanap strong na kisim gutpela sindaun long ples bai ol gavman sevis i ken go insait.

Ol lida i bin wokim dispela toktok taim ol yangpela bilong 7-pela ples long Wau/Bulolo i bin lusim gan, spakbrus na hombru.

Ol lida i tok planti long ol yangpela man i kisim ol gan long lukautim ol na helpim ol long pait wantaim ol raskol.

Tasol ol lida i tok olsem Komyuniti Jastis Senta i statim wok aweanes we i helpim ol pipel long luksave long nogut sait bilong ol gan na smuk nogut.

Nau ol i tok olsem ol i laikim gavman long helpim ol bai ol i stap gut na bai ol i no nap ronawe long polis olgeta taim.

Mausman bilong Gawapu i mekim wanpela singaut i go long gavman long helpim ol long painim gutpela rot long mekim mani bihain long ol i lusim ol gan, spakbrus na hombru na givim i go long han bilong lo na jastis.

Em i tok planti bilong ol i wokim ol hombru long wanem prais bilong bia i wok long go antap. Em i tok tu olsem ol meri na pikinini i wok long salim hombru long mekim mani bilong baim skul fi.

Asisten Komisina bilong Koreksenel Sevis Dominic Tomar i bekim toktok bilong mausman bilong Gawapu olsem gavman i no stap

long ples bilong mekim kamap wok. Em i tokim ol manmeri olsem ol i gat graun we gavman i no inap kisim long ol, na em dispela graun we ol i mas wok na helpim ol long sindaun bilong ol.

Mista Tomar i tokim ol olsem ol bai helpim ol wantaim skills training we ol i bilip bai helpim ol long kamapim gut sindaun bilong ol.

Moa long 10-pela gan we ol i wokim long faktori na fopela ten (40) gan ol i wokim ples.

Ol simuk nogut na ol samting bilong mekim hombru em ol i bin givim go long han bilong ol lo na jastis long Gawapu ples insait long Bulolo.

Dispela em kamap bihain long wanpela aweanes kempein i bin kamap long Bulolo we Komyuniti Jastis Senta yet long Bulolo i bin go pas long em.

Wanpela raskol husat i bin ronawe long polis long 7-pela yia tu i lusim ol gan samting

long ol wokman bilong lo na jastis bihain long wanpela ples lida i tokaut olsem em i marit na gat wanpela pikinini. Lida i tokim ol lo na jastis olsem dispela raskol i no bin mekim trabel long taim em i kam bek long ples.

Taim ol i wok long toktok long lain long ples, ol maus manmeri i tok strong long ol narapela komyuniti long Wau na Bulolo long wanem samting ol ples manmeri bilong Gawapu i wokim.



LUSIM: Ol i lusim ol silinda na ol narapela samting bilong wokim hombru long em.

Finsafen Kokonas helpim pleslain

James Kila i raitim

WANPELA man bilong Mape eria long Finshafen long Morobe provins i go pas long wokim planti kain kain samting wantaim wel bilong kokonas.

Dispela bagaros Tukari Zozingawa i bin soim ol prodak bilong em long Morobe Agrikalsa So na i opim ai bilong planti lain stret long kain kain wok o teknoloji samting em i kamapim.

Dispela wel em i mekim em i wanpela gutpela rot long kisim mani na tu long yusim gut ol kokonas long ples. Maski long wet na salimg kopra tasol, ol lain long ples i ken kamapim planti gutpela samting long wel bilong kokonas.

Dispela wel bilong kokonas em ol i ken yusim long kukim kaikal, mekim sop bilong waswas na wasim klos na tu em i gat gutpela marasin long stopim sua long skin olsem kaskas na ol arapela kain sik bilong skin.

Dispela Finshafen Kokonas Wel Projek em wanpela wok kamap ol lain bilong Morobe Fores Sevis i bin go pas long en long helpim ol liklik manmeri long ples long lukautim ol yet na sindaun bilong ol long ples.

Mista Zozingawa i tokaut tu olsem narapela rot em long mekim ol manmeri long yusim tingting bilong ol long helpim ol yet na noken tingting tumas long samting bilong ol waitman.

Em i tok nau yet Finsafen eria long Morobe i save painim hevi long ol bus ples we ol manmeri long ples i no save salim gut kopra bilong ol na kisim mani. Dispela em bikos sip bilong karim kopra i no save go tumas long hap.

Narapela samting tu em ol dispela lain husat i save go baim kopra i no save baim gut long prais stret.

Dispela i mekim na planti manmeri long ples i les na painim narapela rot long helpim ol yet wantaim wel bilong kokonas.

Paia kamapim hevi long Genoka Setelmen

Sape Metta i raitim

SAMPELA famili long Genoka Setelmen long Goroka, Isten Hailans provins i stap long hevi bihain long paia i kukim ol haus na olgeta samting bilong ol.

17-PELA famili, 12-pela long ol em ol yangpela pikinini i stap nau long bikpela hevi bihain long ol i bin lusim olgeta kago samting bilong ol taim paia i kukim 4-pela haus bilong ol long Genoka Setelmen long Goroka, Isten Hailans i no long taim i go pinis.

Tripela singel mama (widowers) na 12-pela yangpela pikinini we krismas bilong ol i stat long 2 na i go antap long 14 i lusim olgeta kago samting, haus slip, sampela kes mani na ol arapela samting moa long dispela paia.

Paia i bin stat long wanpela haus na bikos long ol haus i pas wantaim wanpela-arapela, tripela arapela haus tu em paia i bin kukim i go daun.

Mausman bilong dispela ol famili, Umba Paulus i tokim Wantok Niuspepa olsem olgeta samting, nupela na olpela em paia olgeta. Wanem samting em ol i gat long en em ol klos we ol i werim na i stap long en.

Em i tok bikpela samting em wanpela laip i no lus long dispela paia. Tasol em i gat bikpela wari tru long 12-pela yangpela pikinini husat bai painim laip i hat long go het.

"Asples bilong mipela em Yongomu long Simbu provins, tasol mipela i no save long asples bilong mipela. Mipela i kam na sindaun long Genoka setelmen inap moa long 30-pela krismas. Na Genoka na Goroka em i kamap olsem asples bilong mipela long wanem mama i karim mipela na mipela i groap long Goroka. Na ol haus em mipela i save i stap na groap long en long las 30-pela yia em paia i daunim na mipela i kisim bikpela taim tru nau," Mista Paulus i tok.

Narapela wari bilong em, em long ol singel mama na ol pikinini bilong ol. Trangu ol mama ya i no save wok. Ol i save mekim infomel sekta wok we ol i save salim ol kago samting long bikpela maket long Goroka.

Laip bilong ol em i stap long ol sels (sales) em ol i save mekim long ol kago em ol i save salim long maket.

Mista Paulus i tok long wik bipo long



PAIA PINIS: Sampela setelmen lain i sekim wanpela long 4-pela haus we i bin paia long Genoka Setelmen i no long taim i go pinis. *Poto: Sape Metta*

ol i bungim hevi, ol i bin baim planti ol nupela kago samting long salim long maket. Tasol olgeta kago samting ya em paia i kukim olgeta. "Na tu moa long K1,500 kes mani em paia i bin kukim long dispela taim," Mista Paulus i tok.

Em i tok kos bilong olgeta haus, mani na kago samting em i kamap olsem moa long K20,000. Tupela liklik pik em paia i bin kukim tu.

Na long statim gen nupela laip wantaim ol nupela samting, em i hat tru, long wanem, ol bai kisim ol samting long we long statim gen nupela laip?

Nau yet Mista Paulus i mekim apil i go long ol wanpela, save lain, ol wan wan famili, na ol arapela lain long helpim ol wantaim ol liklik mani, ol klos na ol samting olsem sospen na ol arapela samting bilong kukim ol kaikai (kitchen utensils) na ol i ken traim long statim laip gen.

Koigiri kisim nupela buldosa masin

James Kila i raitim

MOA long 3,000 manmeri i bin bung long ples Barabuna long Obura-Wonenara Distrik i kisim wanpela buldosa wok masin long memba bilong helpim ol long karimaut wok.

Memba bilong Obura-Wonenara John Koigiri i bin givim buldosa wok-masin D3 long helpim ol pipel long wokim na stretim rot long ilektoret bilong em, na gavman sevis i ken go insait.

Dispela bikpela bung long Barabuna i tukim tu Oposisen Lida, Peter O'Neil, Memba bilong Gumine Nick Kuman, Ekting Etministreta Ceecil Taima na ol wokmanmeri bilong distrik etministresen kam bung long hap.

Nambawan lida long toktok em wanpela komyuniti lida bilong Obura-Wonenara, Wass Hungka, husat i tokaut olsem insait long planti krismas bihain long kantri i kisim independens, nogat gutpela gavman sevis i save go insait long ples bilong ol.

Mista Hungka i tokaut olsem planti taim ol rurel pipel insait long ol viles na hauslain i save bungim planti hevi tru long sait bilong rot na trenspot. Ol pipel i save painim hat taim tru long karim gaden kaikai bilong ol na kopi i go salim.

"Planti ol man long ol narapela ples i save kolim mipela 'wait-hos' bikos mipela i save

karim waitpela kopi stok-fid bek long baksait o sol bilong mipela na save taitim bun na wokabaut longpela hap tru," Mista Hungka i tok.

"Planti taim ol raskol i save stopim mipela long rot na stilim kopi na mani bilong mipela."

Mista Hungka i tok ol i amamas long memba bilong ol long tingim hevi bilong ol na baim buldosa long helpim ol long wokim rot. Em i tok rot tasol em bikpela nid tru bilong ol rurel Obura pipel.

Deputi Lida bilong Pipel Nesinel Kongres Pati Mista Kuman i tok olsem Obura-Wonenara distrik i gat ol risos olsem kopi na tu ol gutpela graun bilong groim ol gaden kaikai long saplain ol narapela senta insait long kantri. Tasol bikos yupela i nogat gutpela rot trangu yupela i save painim hat long mekim gutpela wok o yus long ol risos bilong yupela.

Bihain long toktok bilong Mista Kuman, Oposisen Lida, Mista O'Neil i givim toktok bilong em na katim ribbon long lonsim na kisim ki long kirapim dispela buldosa D-3 wokmasin, na brukim graun long kirapim wok.

Mista O'Neil i tok amamas bilong em i go long Memba Koigiri, husat i tingim ol pipel bilong em long wokim rot na ol sevis i ken go insait long ol pipel bilong em.

Ol lida i tok olsem rot na bris em bikpela samting tru we i ken helpim long bringim developmen i go long ol pipel long bus ples olsem Obura-Wonenara distrik long Isten Hailans, we ol pipel i save painim hat tru bikos nogat gutpela rot.



DELTA WIDE CAB LWB 3 TONNE CARGO TRUCK

FROM **K440*** Per Week

NO DEPOSIT!

with A/C & Power Steering

*Conditions Apply


Ela Motors TRUCKS

For More Information Contact : Jim Maxwell

Phone 3229400

Email : jmaxwell@elamotors.com.pg

*Weekly Payments (Payable Monthly over 48 months plus GST). To Approved Purchasers & Subject to Bank/Finance Approval



Powered by Toyota Diesel Engine

OFFER EXPIRES : 30 / 11 / 2005

WE PROVIDE / TOTAL SALES / GENUINE PARTS & SERVICE BACKUP / FINANCE / LEASE PACKAGES / 15 BRANCHES NATIONWIDE

**Narapela semi trela
kisim taim long friwe**

BIKPELA HEVI: Insait long tupela mun tasol na tupela semi-trela o bikpela kar i painim birua long Poreporena friwe long Pot Mosbi.

Las mun wanpela bikpela birua i bin kamap long Konedobu we i lukim sikspela manmeri dai. Long wiken i go pinis, wanpela arapela wankain kar i kapsait i go insait long barel taim em i laik tanim kona long Spring Garden Road i go olsem long SP Brewery long Gordons, hapsait long Penthouse nait klab.

Nogat man i kisim bagarap tasol wanpela man husait i sanap long sait long rot i lukim kar i kam na em i kalap i go long sait na aburuisim birua.



PHOTO: ANDREW MOLEN

**Australia
helpim Yongai**

Stephanie Waide i raitim

OL pipel bilong ples Yongai insait long Goilala Distrik bilong Sentrel Provins i amamas bikos ol bai gat sans long kisim sevis taim ples balus bilong ol i op.

Dispela bai kamap wantaim helpim we Hai Komisn bilong Australia i givim long ol samting bilong wok long stretim liklik ples balus bilong ol.

Dispela ples balus em wanpela rot tasol we ol pipel bilong Yongai i save kisim helpim na sevis i kam long ausait.

Aninit long HOMDAP progem bilong Australia we i save mekim wok long stopim hangre na sait bilong helt, Australia i lukim hevi bilong ol pipel na i givim ol sampela wilwil, kruba, savol na fok long mani mak bilong K15,000.

Long moa long 3-pela yia i go pinis, ol i bin pasim Yongai ples balus bilong wanem, ol balus i save painim hat long pundaun.

Ol balus we i pundaun i save bagarapim ol wil o sampela pat bilong em.

Long dispela as na olgeta balus kampani i no laik long yusim dispela ples balus.

Long dispela taim, we ples balus i pas, ol pipel bilong Yongai i save wokabaut i go long Kokoda long kisim balus long hap.

Dispela i save kisim tripela o 4-pela de long kamap long hap.

Mausman bilong ol pipel em Adrian Maia i tok em i bin traime long askim ol Sentrel Provinsel gavman na tu i askim ol kampani long sponsa tasol em i no kisim gutpela bekim.

Em tok bikpela hevi i save kamap taim i gat ol sik man long kisim i go long haus sik.

Em i tok tu olsem, balus em i wanpela wei tasol long go kamap long Yongai, na helpim ol i kisim, em i long helpim ol long stretim na lukautim dispela ples balus.

Em i tok tenk yu long HOMDAP long harim krai bilong ol pipel bilong em.

Deahne Turnbull, meri husat i makim maus bilong HOMDAP progem i tok, ol i amamas long helpim ol pipel bilong Yongai.

Em i tok em i bilip olsem ol pipel bilong Yongai bai yusim ol dispela samting gut long helpim stretim ples balus na bai i no gat hevi moa long ples balus bilong ol. Na ol balus i ken ron gen long sevim ol.

**Agrikalsa projek bai
strongim Kairuku na
Woitape pipel**

Salome Vincent i raitim

OL PAPAGRAUN bilong Kairuku/Hiri na Woitape distrik long Goilala i sainim agrimen wantaim Dipatmen bilong Lens na Sentrel Provinsel Gavman long yusim graun bilong ol long mekim wok agrikalsa.

Minista bilong Lens Dipatmen na memba bilong Abau, Dokta Puka Temu i makim maus bilong gavman na givim bikpela tok tenkyu i go long ol papagraun long givim graun bilong ol.

Em i tok ol papagraun i gat gutpela tingting long mekim dispela long wanem, dispela wok agrikalsa bai mekim rot bilong ol yangpela long painim wok, bringim developmen na mekim mani bilong ol yet.

Minista Temu i tok dispela agrimen bai stap aninit long lukaut bilong ol lo bilong kantri.

Ol papagraun bilong Goilala i bin gat kros wantaim ol wokman husat i wok long haiwe bilong ol.

Long dispela kros tasol, wok i stop long tupela mun olgeta.

Presiden bilong Woitape Distrik, Linus Aia i tok, ol i wet long 15 yias pinis long lukim developmen i kamap long distrik bilong em.

Em i tok aninit long dispela projek, distrik bilong em bai kisim gutpela sevis olsem helt na edukesen.

Woitape distrik i givim K30,000 na Sentrel Provinsel Gavman i givim K40,000 i go long mekim dispela rot.

Gavana bilong Sentrel Provins, Alphonse Moroi i tok dispela projek bai givim wok long ol pipel bilong Woitape distrik.

**MERCURY IS
DANGEROUS
AND ILLEGAL
TO CARRY
ON FLIGHTS!**

YOU CAN SAFELY & LEGALLY TRANSPORT MERCURY AS CARGO!

FACTS ABOUT MERCURY & HOW TO TRANSPORT AS CARGO*

- ✓ MERCURY is poisonous to humans ✓ MERCURY must not be brought to the Airport Terminal
- ✓ MERCURY is destructive to aircraft ✓ MERCURY can only be sent as cargo ✓ MERCURY must be declared
- ✓ MERCURY must be labelled ✓ MERCURY must not be taken unpacked to Cargo
- ✓ MERCURY must have correct inner & outer packaging before declaration
- ✓ MERCURY will be refused by Cargo if improperly packaged
- ✓ MERCURY costs little to correctly prepare for Air Cargo

**For further information about
passenger safety please
contact Air Niugini**



*NOTE: Should you choose not to follow the above requirements, your action can cause you to be fined or held in jail (7 years) as determined by Civil Aviation Law.

SDA Bogenvil mama amamas long Madang

Ari Haba i raitim

OL Seven De Etventis Sios Wimens meri Bogenvil i amamas long gutpela lukaut ol bin kisim long Madang taim ol i stap insait long wanpela wik sios bung bilong ol long dispela mun.

Moa long 300 SDA Wimens felosip grup long Bogenvil i bin kisim longpela wok-abaut long Buka i go olsem long Madang long stap insait long wanpela wik bung bilong ol wantaim ol wanlain bilong ol long Madang.

Ol meri i amamas stret long lukim naispela ples Madang,

raun gut wantaim nogat pretpasin na gutpela lukaut bilong ol Madang pipel.

"Mipela bikpela lain i kam wantaim bikpela amamas na olgeta grup bilong mipela i wokim wankain toktok olsem. Ating mipela i kam i stap long wanpela fri kantri o ples mipela i pilim olsem mipela i nogat pret-

pasin i stap long lukluk baksait olgeta taim,"

Matilda Pomoso em lidamenri bilong grup i tok.

Ol meri i tok Madang em i rait ples tru bilong stap long en we Bikman i wokim long ol manmeri i stap gut long em.

"Mipela i ting mipela i mas stap long rait

ples. Taim mipela i raun raun nabaut insait long Madang taun, planti pipel i amamas na lukluk gut long mipela.

Taim mipela i go pas long wanpela ples aninit long pikus diwai, ol man tasol i stap na ol i paitim han bikpela tru long tok welkam na soim amamas bilong ol long mipela.

Dispela pasin ol pipel bilong Madang i soim mipela em mipela i tingting i go i go na i hat tru long mipela i ansaim.

Mipela i tok ol pipel bilong Madang na tu long PNG i gat bikpela lewa long ol pipel bilong Bogenvil. Long planti long mipela, em i namba wan taim long kam hia bihain long

planti yia pait long Bogenvil na mipela i lukim olsem hia long Madang, planti manmeri i amamas long mekim ol kain wok bisnis na i nogat samting i stopim ol. Ol i fri na mekim wok bilong ol," Misis Pomoso i tok.

Bung i bin stat long Mande Oktoba 17 na pinis long Mande Oktoba 24.



SDA MADANG BUNG: Matilda Pomoso i makim ol Bogenvil meri

Anglikea i mekim gutpela wok

...Pasifik lidameri amamas long Senta

TAIM ol man bilong ol i paitim toktok long Mosbi na Madang, ol meri bilong ol Pasifik lida i bin gat progrem bilong ol tu.

Long wanpela wokabaut bilong ol, ol bin raun i go lukim Anglikea Stop AIDS Senta we Angliken Sios i ranim.

Ol lida meri i bin amamas tru long wok Senta i mekim long pait agensim HIV/AIDS.

Ol i tok ol i laik long wankain ol wok i man kamap long ol narapela Pasifik kantri long stopim dispela sik long kamap bikpela.

Ol i lukim rot we gavman na ol NGO i wok bung wantaim, wantaim sapot i kam long ol Aid ejensi long pait agensim HIV/AIDS insait long kantri.

Anglikea em wanpela NGO we i wok long pait agensim HIV/AIDS.

Ol i save givim kaunseling, VCT klinik bilong sekim blut, ol skul bilong dispela sik na tok lukaut long sik AIDS.

"Mipela i save givim kaikai long ol sik manmeri wantaim wanem samting mipela i gat. Dispela ol sik manmeri i kam long ol setelmen na dispela em bikpela lukaut bilong mipela," Kodineta bilong Senta i tok.

Meri bilong Praim Minista bilong Fiji, Lady Leba Qarase i tok, HIV/AIDS em sik bilong olgeta hap long graun na olgeta man i mas bung wantaim long pait agensim dispela sik.

"Ol pikinini bilong yumu bai no inap stap taip longpela taim sapos sik i stap," em i tok.

Meri bilong Praim Minista bilong Tuvalu, Lady Pula Toafa, i sapatim dispela toktok.

Em i tok, planti ol Pasifik kantri i no gat gutpela ol samting bilong halivim ol long wok bilong ol wantaim HIV/AIDS na dispela em wanpela bikpela hevi.


" Mi lukim olsem PNG i wok long pait strong wantaim halivim i kam long ol NGO, tasol olgeta long Pasifik i mas wok wantaim," Lady Toafa i tok.

IMPORTANT NOTICE TO PASSENGERS

DANGEROUS GOODS

If you have packed any of the following goods in your baggage you must declare them.

These goods fall into the following categories.



CORROSIVES
BATTERIES, MERCURY...



GASES




TOXIC
SUBSTANCES




EXPLOSIVES



MISCELLANEOUS:
ASBESTOS, DRY ICE,
ENGINES



INFECTIOUS
SUBSTANCES




INFLAMMABLE
LIQUIDS



ORGANIC
PEROXIDES



RADIOACTIVE
MATERIAL



FLAMMABLE
MATERIAL



OXIDISING
MATERIALS



MAGNETISED
MATERIALS

Does your Bag Exceed 32kg?

At Air Niugini, safety comes first. Occupational Health and Safety Legislation provides guidelines outlining the safe weight that can be lifted by hand. To ensure we comply with these guidelines, passengers will be asked to repack any bag if its weight exceeds 32kg.*

We appreciate your co-operation. We hope you'll understand that at Air Niugini, safety on the ground is as important to us as safety in the air.

*Baggage Limits apply as endorsed in your flight ticket.



Air Niugini

Failure to declare dangerous goods or comply with Civil Aviation Safety Regulations is a serious offence

Meri sumatin kamap daks long Aiyura

James Kila i raitim

WANPELA sumatin meri bilong Aiyura veli yet insait long Isten Hailans provins i bin winim daks bilong 2005 long Aiyura Nesenel Hai skul.

Dispela yangpela sumatin meri Alice Aparima i bin kamap nambawan na i winim awot olsem nambawan sumatin long skul long dispela skul yia.

Greduesen bilong Aiyura Nesenel Hai skul i bin kamap long las wik Fraide na i lukim 264 sumatin i greduet long Gret 12.

Bikman i givim bikpela toktok long ol sumatin em Provinsel Polis Komanda bilong Isten Hailans provins, Superintenden Philip Solala.

Plantil ol lain manmeri olsem ol papamama na ol lain pipel long Aiyura veli i bin kamap long lukim namba 29 greduesen bilong Aiyura Nesenel Hai skul. Sampela lain i bin kam long Goroka na Lae na long narapela hap bilong kantri tu long go lukim ol pikinini bilong ol i kisim setifiket bihain long ol i pinisim Gret 12 bilong ol long dispela skul.

Alice i bin kamap nambawan long ol skul sabjek em long mets



TOP SUMATIN: Alice Aparima i sanap wantaim mama bilong em Hori bihain long greduesen.

B, Bisnis Stadis na tu ol narapela sabjek long skul wok bilong em.

Em i bin winim ol prais em Papindo Treding i bin givim long em olsem

nambawan sumatin long Aiyura Nesenel Hai skul long dispela yia.

Alice em bilong asples viles insait long Aiyura yet em Asarangka. Papa bilong em Leni Aparima em bipo nesenei memba bilong Obura-Wonenara iektoret insait long palamen.

Mama bilong em Hori i bin amamas tru long pikinini meri bilong em long kamap top sumatin long dispela yia.

"Mi olsem mama bilong em mi amamas tru long Alice i kamap nambawan long skul wok bilong em," Hori i tokaut.

Klas tisa bilong i tok amamas long sumatin bilong em i winim nambawan ples long dispela yia.

"Dispela sumatin meri em i gutpela tru long olgeta skul wok bilong em," Mista Gary i tok.

"Alice i save givim taim bilong em long olgeta skul wok na i save helpim tu ol narapela sumatin long ol wok long skul.

"Mi olsem klas tisa bilong em i amamas tru olsem em wanpela asples meri bilong Aiyura yet i winim top ples Aiyura long 2005 skul yia."

Ol narapela awot o i bin givim aut long ol sumatin husat i mekim gutpela skul wok na tu, long gutpela lidasip, pasin na helpim skul.

Bisnis kaunsel opim nupela websait

....Bai wokbung long strongim ikonomi

Salome Vincent i raitim

BISNIS Kaunsel bilong PNG i opim nupela websait bilong em long helpim strongim ol wok bisnis insait long kantri.

Minista bilong Tred na Industri, Paul Tiensten, taim em i opim dispela websait i tok gavman bilong PNG na em yet olsem minista i givim bikpela tok amamas long dispela gutpela wok Bisnis Kaunsel i mekim we i bihainim stret ol senis bilong ol bisnis long kamapim nupela websait.

Websait bai toktok long ol samting i save kamap insait long Bisnis Kaunsel na ol wok bilong ol we i karamapim ol projek na plen bilong yia i kam.

Long dispela taim tu, ol i bin lonsim nupela logo bilong ol wantaim het tok, "Maus Bilong Ol Praivet Sekta" (Voice of the Private Sector).

Lukluk bilong Bisnis Kausel em long Lo na Oda na Foren Afes, Nesenel na Intanesenel Afes, ol plen bilong lukautim kantri na long bungim ol manmeri bilong kantri, telekomu-



MINISTA TRED NA INDUSTRI: Paul Tiensten

nikesen na helpim Wok bisnis na Invesmen insait long kantri na ovasis wantaim.

Minista Tiensten i tok PNG gavman na Bisnis Kaunsel bai wok bung aninit long ol Bisnis Forum, Ministeriel Forum na Nesenel Wok Grup long daunim ol hevi i save bagarapim wok bisnis na invesmen.

Em i tok gavman na praivet sekta i mas wok gut wantaim, long wanem praivet sekta em stap nambawan long mekim save, lukautim na strongim ol nesenei intres bilong PNG.

Bisnis Kaunsel i wok wantaim gavman long helpim ikonomi bilong kantri.

Minista Tiensten i tok amamas long presiden bilong Bisnis Kaunsel, Winifred Kamit na ol wok manmeri bilong em long go pas long bisnis komyuniti.

Japan helpim ol Is Sepik skul

Stephanie Gimo i raitim

OL sumatin insait long tupela skul long Is Sepik bai skul gut wantaim helpim i kam long gavman bilong Japan.

Manimak inap long K700,000 bai helpim long sanapim ol klasrum long Boik Komyuniti Skul na 2-pela dabel stori klasrum blok long Kaup Komyuniti Skul insait long Angoram disrik long Is Sepik Provins na tu, strongim projek i lukluk long strongim skul developmen.

Ambaseda bilong Japan long Papua Niugini Katsuo Yamashita i bin go long givim mani long ol nupela klasrum bilding long Wewak taun insait long Is Sepik las wik Fraide.

Helpim mani i kam aninit long Grent Asistens bilong Grasruts Projekts (GGP) Program bilong gavman bilong Japan.

Mani mak bilong K240,000 i go long Projek bilong Boik Komyuniti

Skul Developmen taim K220,000 i go long Projek bilong Kaup Komyuniti Skul Developmen na narapela K240,000 i go long Projek Komyuniti Skul Developmen.

Ol bai yusim dispela mani long baim ol samting bilong sanapim tupela dabel klasrum bilong Boik Komyuniti skul, wanpela dabel klasrum bilong Kaup Komyuniti skul na tupela dabel klasrum bilong Muik Komyuniti skul.

Ambaseda Yamashita wantaim het tisa bilong Boik Komyuniti Skul Herman Karum, het tisa bilong Kaup Komyuniti Skul Lucas Bonima na het tisa bilong Muik Komyuniti Skul i bin sainim dispela kontrak.

Praim Minista na Gren Sief Sir Micheal Somare wantaim Minista bilong Nesenel Plening na Rurel Developmen na Memba bilong Angoram Arthur Somare tu i bin stap long lukim gavman bilong Japan i givim dispela helpim mani long ol skul.

PNGDF i salim ol sut man long Australia

Stephanie Waide i raitim

FAIVPELA top sutman bilong PNG ami bai makim kantri long wanpela bikpela resis long sut wantaim gan long Australia.

Dispela i kamap bihain long Goldie Ami Bareks i bin go

pas long wanpela tripela wik resis we i lukim 5-pela yunit bilong PNG Difens Fos i resis.

Sief ampaia bilong dispela resis, Komanding Opisa Meja Walter Enuma i tok dispela resis i helpim ol PNG soldia long strongim save bilong ol long dispela kain wok.

Em i tok tenk yu long Difens Fos bilong Australia long kamapim dispela resis.

Meja Enuma i tok ol kain ol praktis olsem i helpim long strongim save bilong PNGDF.

Em i tok tenkyu tu long ol yunit we i lukim Goldie Bareks i kam pas, fes batalien, 2nd batalien,

enjinia batalien i kam namba fo na PBB Lombrum i kam numba 5.

Long dispela 5-pela yunit, ol i makim 10-pela top sutman na narapela 10-pela olsem risev.


Sajen Egan bilong Australia Difens Fos (ADF) na man i go pas long dispela resis i amamas long wok

ol PNGDF soldia i wokim.


Em i tokim ol husat i stap bek i mas go het long yusim ol samting we ol i lainim na tu, stap na praktis moa.

Long dispela resis tu, na wantaim helpim bilong ADF, PNGDF i luksave long sampela ol top sut man bilong ol insait long PNG.

OL
PIKSA
BILONG
SIK
BILONG
PISIN



REDI LONG INDAI:
Ol kakaruk i stap laip yet i hangamap long ol huk insait long ples bilong kilim ol abus long Sauten Belgium. Wanpela ejensi bilong Yunaitet Nesens i givim strongpela tok lukaut long pasin bilong putim tambu long ol kakaruk i kam long ol ausait kantri long banis agensim dispela kus bilong pisin sik nogut. Dispela ejensi i tok dispela bikpela tambu i ken bagarapim wok bisnis insait long wol.
REUTERS



SEKIM OL: Wanpela saveman bilong pisin long kantri Hangeri i sekim na makim ol wel pisin insait long kantri bilong em. Gavman bilong Hangeri tu i taitim wok lukaut bilong ol agensim dispela kus sik bilong ol pisin na nau ol i stat long sekim ol wel pisin tu. Dispela sik nogut i kamap pinis long kantri Kroesia (Croatia) na Romania. Dispela tupela kantri wantaim i stap long sait sait bilong Hangeri.
REUTERS

EDUCATION PAPUA NEW GUINEA Achieving a better future

Education is NOT FREE!

It is a shared responsibility by parents, teachers, community and governments

Parents

Parents are responsible for making sure that their children, girls and boys are enrolled and attend school everyday. They should encourage their children to remain at school and complete their education. Parents are also responsible for payment of school fees in cash and in kind. Parents will also be involved in Elementary teacher selection and training and give support in traditional and cultural knowledge for their schools.

Community

The Communities are responsible for school property, infrastructure and maintenance. The support for their schools either through financial assistance, provision of land and acquisition, skills, knowledge and determination of local curriculum content will greatly enhance our education system. Decision making by both women and men from the community is another way in which communities can support their children in their schools and set a good example.

School Boards of Management (BOM) and Boards of Governors (BOG)

School Boards of Management and Boards of Governors are responsible for determining the aims and goals of their schools and the supervision of the achievement of those goals. They are also responsible for the planning and provision of school buildings, teachers' houses and other facilities required by the school, planning and funding maintenance programs. Locally based curriculum development and implementation, appraisal of teachers and appointments, consultations with ward councillors for infrastructure requirements are some responsibilities of BOM/BOGs.

Local level Governments

Local level Governments are responsible for budgeting for establishment grants for all new Elementary schools.

Provincial Governments

The responsibility for the completion and endorsement of all Provincial education plans, allocation of elementary establishments between districts, appointment of teachers and creating necessary teaching positions lies with the provincial governments. They are also responsible for maintenance of schools/centres and selection of Grade 9 students for continuation to Grade 10 and a scholarships administration scheme. Other responsibilities lie in the vocational school sector where enrolments, local curricula development, identification of courses to be taught, appointment of instructors and creation of necessary teaching positions.



Students of British Community School, Maprik



Triculate art on Maprik District Office



Elementary teacher with pupils at Maprik Central

National Government

The responsibilities of the National Government are:

- the payment of teacher salaries
- the training of elementary school teachers
- curriculum development and development of orthographies
- the provision of supervisory services
- the provision of opportunities for the professional development of teachers
- the allocation of new classes to each province
- the provision and distribution of basic school supplies
- providing technical assistance in areas of planning, management and legal matters.
- pre-service training of primary school teachers/vocational centre instructors
- provision of inspectorial services
- the provision of opportunities for teacher development
- the allocation of teachers and new classes to provinces
- the development of policy relating to school subsidies.
- Selection of students for Grade 11
- Determination of criteria for Grade 11
- The preparation and administration of the School Certificate and the Higher School Certificate Examinations
- Pre-service training of secondary school teachers curriculum development
- the administration of national high schools
- the allocation of teachers/instructors to provinces
- the allocation of new Grade 11 and 12 classes to each province
- the development of policy relating to school subsidies and the scholarship program.

More information can be obtained by contacting:

- the principal or head teacher in your local school or teacher's college.
- Officers in your district education office including the district education administrator, elementary trainer and primary inspector.
- Officers in your provincial education office including the provincial education advisor, reform coordinator, planner, inservice coordinator, elementary inspectors and training coordinators, primary, secondary and vocational inspectors.

Education information and publications are available from:
Department of Education
Media and Communication Unit
First Floor, Fincorp Haus, Waigani
PO Box 446, Waigani, NCD, Papua New Guinea
Fax: (675) 301 3544

Education PNG is a community awareness initiative by the government of Papua New Guinea. Supported by the Government of Australia through the Education Capacity Building Program.



BAIM YET: Maski i gat bikpela sik nogut bilong ol kakaruk i stap nau na kamapim hevi long planti kantri long wol, ol manmeri long Indonesia i wok long makim na baim ol kakaruk long ol lokol maket insait long siti Jakarta. Indonesia i wok long mekim wok painimaut long ol nupela pisin sik insait long ol kakaruk long Bali ailan bihain long sampela pisin insait long ol banis bilong ol man i wok long dai.
REUTERS



BANIS MARASIN: Wanpela helt wokman bilong kantri Saina i spreim marasin klostu long ol pato long wanpela maket long Hefei ples long Saina. Wanpela yangpela meri i gat wanpela ten 2 krismas tasol i bin dai long wanpela ples insait long Sentrel Saina we namba tri bikpela pisin sik i bruk insait long wanpela wik tasol.
REUTERS



GUTPELA MIT, TASOL: Ol kakaruk i sindaun insait long wanpela maket long bik taun Denpasar long kantri Indonesia. Bali ailan em i wanpela long ol ples we dispela hevi bilong pisin sik i bin kamap long en pas.
REUTERS





KARAMAP BILONG RAIS:
 Wanpela yangpela Indonesia manki i karim ol kokonas lip basket long salim long wanpela lokol maket long Makassar, Sulawesi provins. Ol dispela lip basket em ol i save kukim rais insait long en wantaim kakaruk o mit kari. Planti milien pipel long Indonesia bai kaikaim long taim bilong amasim Eid Al-Fitr, wanpela bikpela taim bilong ol muslim lotu. Em i makim pinis bilong santu mun bilong Ramadan. **REUTERS**



PAINIM OL HAUS: Ol lain turangu bilong kantri Kashmir long India i wok long dikim graun painim haus bilong ol. Bikpela guria i bin kamap na bagarapim planti ol ples long hap. Bikpela pret tingting nau i stap wantaim ol planti tausen manmeri i stap long ol maunten long Kashmir. Dispela bikpela guria i bin kamap long Oktoba 8 yet, tasol ol pipel i wok long karim bikpela bagarap yet. **REUTERS**




AMAMAS: Ol Oposisen Sivik Yunaitet Fran (CUF) sapota i amamas klostu long wanpela rot blok i paia i stap bihain long bikpela pait wantaim ol sekyuriti opisa insait long Zanziba. Bikpela oposisen pati long Zanziba i tok long tuned olsem kendidet bilong em i winim presidensel pol. Ol sekyuriti fos i bin pait wantaim ol oposisen sapota. **REUTERS**



PAIT: Wanpela memba bilong Tanzania sekyuriti opis i sut long tiages i go long ol paitman bilong CUF. **REUTERS**

SEALARK



Lae - Oro Bay - Alotau - POM - Lae


NON BELONG BELONG LONG ALOTAU WIK

FRAIDE	Lae	LAE	3 kilok moning
SAREDE	Koror long Lae	ORO BAY	6 kilok moning
	Lae	ORO BAY	9 kilok moning
SAREDE	Koror long Lae	ALOTAU	6 kilok moning
	Lae	ALOTAU	9 kilok moning
MAUDE	Koror long Lae	POT MOSHI	6 kilok moning
TUNDE	Lae	POT MOSHI	10 kilok moning
TRINDE	Koror long Lae	ALOTAU	10 kilok moning
	Lae	ALOTAU	12 kilok holo
FONDE	Koror long Lae	ORO BAY	6 kilok moning
	Lae	ORO BAY	12 kilo holo
FRAIDE	Koror long Lae	LAE	6 kilok moning

Ol pikinim, samath na grup wal i kisin bikpela diskaunt. Tiket i stap wan long Bismark Maritime Opis long Pot Moshi na tu long Sealark.

EM I MEKIM RON NAU!

Lukluk bek long Pasifik Ailans Forum wantaim Wantok Edita Neville Choi



PNG I GO PAS: Praim Minista Grand Chief Sir Michael Somare nau em i Siaman bilong ACP na em i bin siaman bilong PIF kibung. Dispela luksave i makim sanap bilong PNG insait long rijen.

BIPO long Pasifik Ailans Forum (PIF) bikpela kibung bilong ol Pasifik lida i bin kamap long Pot Mosbi long wik i go pinis, i bin i gat bikpela toktok i kirap long as tingting bilong PIF na wanem ol samting Papua Niugini, olsem namba wan bikpela kantri insait long rijen bai paitim toktok long en.

Praim Minista Sir Michael Somare em i sindaun olsem Siaman bilong Pasifik Ailans Forum, na dispela i lukim PNG i go pas long lukautim sindaun bilong dispela bikpela kibung.

Ol tingting yumi yet long PNG na planti long ol arapela lida insait long Pasifik i bin laik glasim i bin karamapim;

"Tok oraitim bilong Pasifik Plen, wanpela plen i bungim, olgeta tingting bilong ol Forum memba kantri bilong stiaim ol long strongim gro bilong ol wan wan ikonomi, strongim wok developmen insait long rijen, strongim stretpela wok pasin na strongim sekuriti bilong Pasifik; na

"Kisim tok orait bilong Australia na Nu Silan, tupela bikpela kantri insait long PIF bilong opim rot bilong ol Pasifik manmeri long go wok sotpela taim long ol prut na kaikai fam insait long dispela tupela kantri.

Ol i bin paitim toktok long ol bipo samting we PIF i bin save glasim olsem developmen halivim i go long ol liklik ailan kantri, wok traime bilong ol nuklia posin bom, wokbung long sait bilong fiseris, na ol i bin makim tu ol nupela samting i kamap long ai bilong PIF olsem hevi bilong sik HIV/AIDS, Avian Influenza o kus bilong pisin na bikpela tru em wok sekuriti insait long Pasifik.

Long as bilong painim ol nupela na moa strongpela rot bilong stretpela olgeta ol dispela samting, ol Pasifik Ailan lida i bin wanbel

olsem dispela Pasifik Plen em i rot bilong daunim na stretpela olgeta ol dispela samting.

Aninit long het tok "Kamapim wanpela Strongpela Pasifik", ol lida i bin sindaun. Bikpela as tingting tru bilong olgeta lida i kamap long dispela kibung em long kamapim gutpela taim na sindaun bilong ol Pasifik pipel.

Taim kibung i bin op, Siaman Praim Minista Gren Sief Sir Michael Somare i tok klia olsem maski i bin i gat sampela tok agensim Pasifik Plen, sapos ol i no bin tok oraitim dispela plen, bai i nogat gutpela rot long luksave long ol hevi Pasifik rijen i wok long bungim tete.

Sir Michael yet i bin tok klia olsem ol lida i noken asua na larim dispela plen i sindaun na pulim das tasol.

Em i bin autim tingting bilong em tu olsem ol liklik ailan kantri we ol i kolim ol Smol Ailan Stets i wok long karim bikpela hevi na ol bikpela kantri i gat planti risos i mas halivim ol.

Pasifik Plen

Bikpela singaut i kam long ol sivil sosaiti grup insait long Pasifik. Dispela lain em ol non gavman ogenaiesesen na ol lain husat i save wok bung long lukautim bus, graun na wara na sindaun insait long komyuniti. Askim bilong ol i bin go long Jenerel Sekretri bilong Pasifik Ailans Forum Sekretariat, Greg Urwin i bin go agensim tok oraitim bilong Pasifik Plen.

Dispela singaut bilong ol i bin lus nating taim ol Pasifik lida i bin tok oraitim Pasifik Plen long sindaun bilong ol long Madang.

Mista Urwin yet i bin tokim ol mausman bilong ol Pasifik sivil sosaiti grup olsem dispela Plen em bai no inap stap olsem i go olgeta nau, na bai i gat sans long senisim bilong

kamapim gutpela sindaun bilong ol pipel insait long rijen.

Sotpela taim wok program bilong ol yangpela Pasifik manmeri i go olsem long Australia na Nu Silan i no bin kisim luksave long tupela kantri.

Praim Minista bilong Nu Silan, Helen Clark i bin tok klia olsem Nu Silan i gat tingting long givim luksave long dispela program ol Pasifik ailan kantri i laik kamapim, tasol Australia Praim Minista, John Howard i bin strong tru olsem dispela i no gutpela long wanem bikpela wari bilong ol na Nu Silan em ol Pasifik manmeri bai go wok long ol prut plantesen long Australia na Nu Silan na les long go bek long ol as ples bilong ol.

Maski ol Pasifik lida i bin strongim tingting long opim rot bilong dispela program, olgeta toktok bilong ol i bin lus nating taim Australia i bin autim tingting bilong em long sanapim wanpela Pasifik teknikel koles long givim trening na skul long ol yangpela Pasifik manmeri.

Bihain long bung bilong

ol lida long Madang, Forum i pasim tok long larim dispela program i stap pas-taim olsem wanpela samting bilong glasim bek gen long narapela sindaun bilong ol.

Kus bilong pisin o Avian bet flu hevi

Planti toktok i kamap long sait bilong hevi bilong dispela kus o sik bilong ol pisin we i wok long kamapim bikpela bagarap insait long ol kantri long Saut Is Esia na nau i wok long kam olsem long Pasifik.

Bikpela laik bilong ol Pasifik kantri em long sanapim wanpela kain banis agensim dispela sik na long sanapim ol rot long skelim strong bilong dispela sik na painim rot long daunim em sapos em i kamap insait long ol wan wan liklik Pasifik kantri.

Ol lida bilong ol Liklik Ailan kantri i autim wari bilong ol olsem dispela sik nogut bai bagarapim ol tru. Ol i singaut long ol Pasifik ailan kantri long wok bung na bungim ol strong bilong ol long kamapim ol nesanel

na rijinel plen bilong redi long dispela sik nogut.

Ol i askim tu Australia na Nu Silan long givim halivim long Forum bai ol i ken bung na kamapim wanpela rijinel plen bilong pait agensim dispela sik.

PNG kisim wanem kain gutpela samting?

Papua Niugini, kantri bilong yumi i kisim wanem kain ol gutpela samting long dispela bikpela bung?

Namba wan bikpela luksave PNG i kisim long dispela bung em luksave olsem bihain long tripela ten krismas, PNG i sanap strong yet. Sir Michael i bin givim bikpela luksave long ol manmeri husat i bin hat wok tru long halivim long lukautim ol lida na mausman bilong ol arapela Pasifik kantri husat i bin kamap long dispela bikpela bung.


Tru tumas, ol wok manmeri bilong gavman bilong yumi i bin mekim bikpela wok tru. Long dispela taim long makim tripela ten krismas independens bilong yumi em i bikpela luksave tru.

I bin i gat wan wan long ol liklik asua i bin kamap long sait bilong semim wan wan long ol Pasifik lida, tasol dispela olsem Minista bilong Inta Gavman Rilesens Sir Peter Barter i bin tok, em samting bilong ol lida long tok sori long ol lida yet.

I tru olsem pasin bilon yumi long PNG em yumi mas karim bikpela sem tru, tasol dispela em i no samting bilong tromoi mani long kirapim wanpela bikpela wok painimaut olsem sampela lida long Palaman i wok long singaut bihainim.

PNG em i namba wan kantri insait long Pasifik rijen we namba bilong ol manmeri na risos i winim mak bilong olgeta arapela kantri.

Dispela luksave i kam long ol arapela liklik kantri insait long Pasifik na em i strongim sanap bilong yumi insait long Pasifik. Aninit long ol paitim tok nau, i kamap klia olsem yumi PNG em ol arapela liklik kantri i save lukluk long yumi long o pas long ol bikpela wok insait long rijen.



STRONGIM KONA: John Howard na Australia i strongim kona yet agensim tingting bilong Pasifik long larim ol yangpela bilong ol long go wok long Australia na Nu Silan long ol prut fam bilong ol. *Ol Foto: Neville Choi*

Lukautim kalsa

Bustin Anzu i raitim

PAPUA Niugini mas amamas long ol pasin tumbuna long wanem em i narakain olgeta insait long wol.

Ol narapela kantri i nogat dispela kain, siaman bilong lotu insait long Morobe Eksekutiv Kansil Owae Nunzik i tok.

Mista Nunzik i tok olsem Morobe em i wanpela Provins we i save putim gutpela luksave long wanem Provins i save lukim ol Niugini Ailans, Hailans, Momase na Sauten rijen i stap. Em i mekim dispela toktok bihain long em i givim K2000 wan wan i go long tupela grup bilong Sialum Lokal Level Gavman Kaunsil.

Tupela grup em Namu Kalsural Grup na Onoka Sirokai Tiata Grup, husat i kamapim ol kain kain pilai insait long Lae siti long wanpela mun i go pinis.

"Mi laik salensim Turisim Promosen Atoriti (TPA) na ol ovasis misin long maketim dispela pasin tumbuna long ovasis long pulim ol turis i kam insait long kantri na lukim," em i tok.

Em i tok TPA i no wokim planti wok long maketim pasin tumbuna bilong yumi na dispela opis long Pot Mosbi em i wokim liklik long sait bilong maketing we i lukim liklik lain turis i save kam long kantri.

"Mi laik tokim gavman olsem em i mas skelim gut wok bilong TPA long wokim bikpela wok long adve-taisim na maketim pasin tumbuna na kalsa ovasis," em i tok. Em i tok moa beta long yusim ol TV na ol buk megesin bilong ovasis long kam na maketim dispela kalsa wantaim pasin tumbuna.

Em i tok tu olsem TPA na dipatmen bilong Kalsa na Turisim mas wok klostu wantaim dipatmen bilong Foren Afes, Tred na Industri na ol narapela dipatmen long mekim wok bilong maketim pasin tumbuna na kalsa, wantaim ol gutpela samting bilong kantri long ol.

Wanpela man makim maus bilong tupela grup Gring Nawa i tok tru tru pasin tumbuna na kalsa nau i wok long dai long wanem ol lain long taun na siti i wok long soim pasin bilong wait man/meri long ol. "I no long taim pasin tumbuna na kalsa bai dai olgeta sapos mipela i no was gut," em i tok.

TAIM BILONG MUMU NA PENIM PES:

EM I taim bilong mumu na tu em i taim bilong penim pes. Long wanem as? Em i taim bilong marit long stail bilong ol lain Gahuku traib o pisin long Isten Hailans provins. Marit seremoni long dipela era i gat kik tu ya.

Ol Foto: Sape Metta



Tambolema Rekoding Studio i op

Aloysius Laukai i raitim

BOGENVIL i bin lukim kirap bilong wanpela rekoding kampani long Buka long las Fraide.

Tambolema Rekoding Studio i bin opim dua bilong em long wokim rekoding long ol pipel bilong Bogenvil.

Spika bilong Haus ov representativ bilong Otonomes Bogenvil Gavman (ABG) Nick Peniai long taim em i opim dispela nupela studio i bin tok amamas long kampani, Tambolema Trading Limited, long go het na kirapim dispela nupela studio long Buka.

Em i tok ABG we Presiden Joseph Kabul i go pas long em i sapotim tru wok bilong musik industri na bai em i go het long strongim dispela wok insait long Otonomes Rijen.

Spika Peniai i bin singaut tu long ol musik lain bilong Bogenvil long kamapim wanpela musik asosiesen we Otonomes gavman inap long wok wantaim long strongim moa musik industri.

Mista Peniai i bin tok amamas tu long Tambolema Rekoding Studio long tingting bilong em long pinisim olgeta keset long Buka yet.

Emi tok moabeta dispela em i wanpela rot Bogenvil musik bisnis inap long gro kwik.

Emi tok sapos Bogenvil inap long kamapim yet ol keset na CD long Bogenvil yet, dispela inap long helpim ol yut na ol atis long sevim mani long wokim recoding long ples longwe.

Spika i bin tok tu olsem music industri long PNG i no bin nap long developim ol gut-

pela musik man wantaim mani long han bilong ol na Bogenvil i laik lukim senis long dispela sait.

Long wankain taim, memba bilong Hagogohe insait long ABG, Robert Hamal Sawa i bin tok amamas tru long Rekoding studio i kirap long Buka.

Em i tok ol Bogenvil i man-meri bilong singsing na ino gutpela long go rekot longwe long ples.

Em i tok ol enjinia bilong ples yet inap long miksim gut saun long kain stail Bogenvil yet i laikim.

Memba i tok Bogenvil Musik inap long painim spes long wol market sapos yumi developim gut na maketim.

Em i tok Bogenvil flut o mambu em i stail yet ol man-meri bilong narapela kantri i save laikim.



NUPELA REKOT STUDIO: Spika Nick Peniai i katim riben long opim nupela studio.

Mama bilong 4-pela putim famili i go pas

WANPELA mama bilong Sentrel provins husat i gat 4-pela pikinini i no long taim i go pinis i brukim PNG musik indastri. Em i no tingting planti long lusim gutpela nem bilong em insait long komyuniti we planti manmeri i ken lukim em olsem wanpela ples meri tasol, na em i mekim wanem long rekodim wanpela musik albam.

Tasol em i no wari. Dispela mama bilong Keagolo ples Aroma Kos insait long Sentrel provins i go het tasol na rekodim wanpela albam wantaim SoundView Studios long Pot Mosbi. I no long wanem samting, long bikpela laik bilong em long man bilong em, tripela brata bilong em yet na bilong famili bilong em.

Na mi yet mi kisim stori olsem Vagi Kora, husat em i wanpela mama bilong ples i gat bikpela tambu bihainim pasin tumbuna long singsing long pablik. Dispela pasin em ol bai tok olsem em i brukim pasin kastom na em i mas kisim tok orait i kam long ol pipel bilong Keagolo yet.

Tasol mi yet mi ting olsem em i wanpela strongpela meri tru, husat i tingim man na ol brata bilong em, na mi givim luksave long em.

Mama i no bilong musik tumas

Insait long PNG bai yu no inap painim ol mama i go pas long mekim wok insait long musik rekoding bisnis. Mi yet mi bin railim stori long wanpela mama long Pot Mosbi yet husat i sanap strongim Cyclone Studios, husat i save wok aninit long Pawahouse Distributa bilong Lae.

Meri Bogenvil, Marie Muganaua em i mama bilong supa produsa na save man bilong kompyuta, Emmanuel Muganaua bilong Cyclone Studios, wantaim famili bilong em i wok hat tru na i go pas long kamapim gutpela wok long studio bilong ol i kam inap long mak em i stap nau.

Tasol em i no min olsem ol meri i nogat nem long musik rekoding bisnis. Nogat tru. Ol i stap. Planti long ol em yumi save harim nek bilog ol. Sampela long ol dispela supa musik mama em Cathy Lee Chan, Rabbie Gamenu, Gao Gaoma, Aida Paska, Julie toliman Turagil na planti moa. Tasol i nogat wanpela i wok strong long mak bilong Vagi ora, mama bilong 4-pela pikinini bilong Sentrel provins husat i go pas long musik grup bilong em long katim namba wan albam bilong ol.

Olsem wanpela memba bilong ben Viugolo 2, Vagi i mekim olgeta wok. Stat long stretim na mekim olgeta rekoding i go inap long mekim wok bilong em olsem mama bilong 4-pela pikinini bilong em na lukautim sindaun bilong man bilong em Genna Kora husat i holim wok olsem ben menesa.

Em i save painim taim long mekim olgeta dispela wok, em mi no save em i save kisim long wanem hap.



Vagi mekim bikpela wok

Vagi i save singsing lit vokels long dispela namba wan albam ol i kolim Guagaro we i kamaut aninit long nem bilong SoundView Studios. I no long taim nau bai em i kamaut long ol stua long Mosbi na Sentrel Provins.

Viugolo 2 em i wanpela ben i kamap long Viugolo Origionators na wanpela ben memba bilong ol Oxie Ila bihain long em i lusim ben na statim dispela nupela grup wantaim Pexie Ila na Wilson Panaka. Ol i save pilai long ol danis na bung i kamap long ol ples long Rigo na Aroma eria.

Tasol tupela brata, Pexie na Oxie i pillim olsem nek bilong ben i no kra gut yet. Ol i kirap na askim susa bilong ol Vagi long kamap lit singa bilong Viugolo 2 long wanem em i save singsing long ol bikpela bung long ples na em wanpela meri tasol long ples bilong ol i gat gutpela nek bilong singsing.

Vagi i wanbel tasol taim toktok bilong rekodim wanpela albam i kamap bikpela namel long ol famili memba bilong em. Em i bin tok klia olsem em i laik wok long halivim man bilong em na ol brata bilong em, na i no bilong em yet.

Ol rekoding i bin stat long namba wan wik bilong Oktoba taim Ben Menesa Genna Kora i kisim ben i go long Keagolo ples inap long tupela wik. Genna em i wanpela elementeri skul tisa long ples na em i makim stret taim bilong skul i malolo.

Ben nau i bin Vagi Kora long lit vokels, Wilson Panaka, Pexie na Oxie Ila i mekim ol bekup vokels aninit long stia bilong Genna, na SoundView enjinia, Leo Kana i lukautim olgeta musik masin.

Tupela wik bihain, ben i stretim olgeta singsing na musik i go insait long wanpela 10 trek albam wantaim ol singsing i pairap long Rigo na Aroma tok ples.

Eksekutiv Produsa, Anua kana i tok em i ai op tru long nek na singsing stail bilong Vagi.

"Em i save long singsing, maski em i ples meri tasol, na em i mekim wok i isi moa."

Ana i tok save bilong Vagi long singsing insait long ples i kamap klia tru insait long ol rekoding.

"Wanpela samting tasol we i no gutpela tumas em em i kisim nem nogut long ples bihainim pasin

tumbuna. Bikos em i save amamas tru long mekim dispela kain wok na mi yet mi ting ol dispela strongpela tumbuna pasin manmeri bai luksave long strong bilong em," anua i tok. "em i noken haitim dispela strong bilong em, long wanem em i ken serim kalsa bilong Keagolo na tumbuna pasin wantaim PNG insait long musik na singsing."

Albam i strong long tok ples

Ol singsing long nupela albam i stori long laik pasin o lav, laip an wanpela em i stori long dai bilong wanpela wanfamili na ol i singsing long tok ples Rigo na Aroma, Rigo na Keagolo tok ples.

Wanpela arapela samting em ol pipel bilong Keagolo ples i ken toktok na klia long ol tok ples bilong Rigo na Aroma tasol nogat wanpela i ken toktok Keagolo tok ples, olsem na dispela Guagaro albam em i narakain olgeta.

Taim em i stap long ples, Vagi i save mekim olgeta samting ol meri bilong ples i save mekim. Em i save lukautim famili bilong em.

Em i bin stat singsing taim em i bin liklik meri yet, na em i bin i gat tripela arapela susa bilong em husat i save singsing tu.

"Vagi i bin klia long ol hevi em bai bungim taim em i go insait long dispela wok tasol em i luksave long ol tumbuna pasin na kalsa na em i go het long halivim man bilong em na ol brata na mi luksave na onaim dispela," Anua Kana i tok. "Na mi mas tok olsem em i no karim tasol nem bilong famili bilong em, tasol em i mas kisim luksave olsem namba musik meri long pinisim wanpela ful albam aninit long SoundView Studios. Em i bikpela samting tru ya."

Em bai gutpela albam tru

Leo Kana, Saun Enjinia wantaim SoundView i tok olsem dispela albam Guagaro we bai i kamaut long 2005 bai wanpela gutpela albam tru.

"Mi bilip olsem dispela albam bai kamap namba wan tru na atung bai em i paia long Sentrel provins na



MAMA BILONG CYCLONE: Marie Muganaua na man bilong em Tarcissius em ol lain i go pas long Cyclone Studios. Marie em i wanpela long ol meri husat i save mekim bikpela wok long sait bilong musik.

long Rigo na Aroma," Anua i tok. "Ol rekoding em ol i mekim bilong olgeta na ol arapela hap bilong kantri bai laikim tu."

Olgeta wok bilong stretim dispela albam i no pinis olgeta yet, na Anua i tok singsing Akaugule em wanpela singsing bilong lukluk long em long wanem em i wanpela long ol strongpela singsing long albam.

"Yes, atung dispela singsing bai wanpela strongpela singsing long dispela albam na wanpela we olgeta manmeri long Rigo na Aroma Kos bai singsing bihainim long dispela Krismas na Nu Yia taim."

Ol arapela gutpela singsing em Veruagolo, Kiri, Nauku, Gua Garo na ol arapela.

Taim mi askim Kana long wanem tru na piksa bilong Vagi i no stap long kava bilong albam, Anua i tok em i laik bilong Vagi yet long piksa bilong em i noken stap long fran bilong albam kava.

"Bihainim lukave em i givim long kalsa na pasin tumbuna bilong em, em i no laikim piksa bilong em long stap long albam na em i askim ol

pikinini bilong em long makim em long poto."

Ol memba bilong Viugolo 2 i go bek pinis long Keagolo ples long wetim olgeta wok i pinis na albam long kamaut.

Na tokwin i kam long ples em ol ples manmeri i wok long wetim tasol albam bilong kamaut bai ol i baim kopi bilong ol. Na Vagi yet i noken wari tumas long ol hevi bilong em long rekodim dispela albam, long wanem em i mekim long nem bilong man bilong em, ol brata bilong em, na ol komyuniti bilong Rigo na Aroma Kos insait long Sentrel provins.

Luksave i go long yu, Vagi na Viugolo 2.

****Yu ken ritim ol stori bilong Musik olgeta Mande insait tasol long The National**

Raun wantaim Kanage olgeta wik



YUMI FM NATIONAL WEEKLY HITPARADE Novemba 05, 2005

Table with 3 columns: Singing, Musik Atis, and Dispeia Wik. It lists 20 songs and their respective artists and chart positions.

TV GAID

TV Gaid schedule for 3 Novemba (FONDE), 7 Novemba (MANDE), 4 Novemba (FRAIDE), 8 Novemba (TUNDE), 5 Novemba (SARERE), 9 Novemba (TRINDE), and 6 Novemba (SANDE). It lists various programs and their start times.

CATHOLIC RADIO 103.5 FM

Catholic Radio 103.5 FM schedule for 3 Novemba, 4 Novemba, 5 Novemba, 6 Novemba, 7 Novemba, 8 Novemba, and 9 Novemba. It lists various religious programs and their start times.



Radio Australia
Tok Pisin News

Hari TOK Pisin News Radio Australia
101.9FM Port Moresby
Ya ken harim Radio Australia
Island Inland & TV News Forum
Tok Pisin Service
Sam. Tam. 2080, 7240(KHZ)
Ene. Oun. 898, 8920, 9710, 1280(KHZ)

RADIO TOK PISIN PROGRAM	
TUNE IN: 101.9 FM	
Radio Australia Tok Pisin Program - stat long mun Mas 2005	
MANDE Moring	6AM Stesen Op - Nius Heltain - Musik na ol intaviu
6.30AM	Nius na Karent Afes
7AM	Stesen Pas
Nait	7PM Stesen Op
7.01PM	Oi Heltain na Program Priviu
7.15PM	Spots
7.30PM	Nius na Karen Afeas
8PM	Helt
8.15PM	Musik
8.30PM	NIUS
8.40PM	Spots Riplei
8.55PM	Musik
9PM	Stesen Pas
TUNDE Moring	6AM Stesen Op - Nius Heltain - Musik na ol intaviu
6.30AM	Nius na Karent Afes
7AM	Stesen Pas
Nait	7PM Stesen Op
7.01PM	Oi Heltain na Program Priviu
7.15PM	Musik na Chit-Chat
7.30PM	Nius na Karen Afeas
8PM	Mama Graun
8.15PM	Musik/Spots
8.30PM	NIUS
8.40PM	Helt Riplei
8.55PM	Musik
9PM	Stesen Pas
TRINDE Moring	6AM Stesen Op - Nius Heltain - Musik na ol intaviu
6.30AM	Nius na Karent Afes
7AM	Stesen Pas
Nait	7PM Stesen Op
7.01PM	Oi Heltain na Program Priviu
7.15PM	Musik na Chit-Chat
7.30PM	Nius na Karen Afeas
8PM	Focus
8.15PM	Musik/Spots
8.30PM	NIUS
8.40PM	Mama Graun Riplei
8.55PM	Musik
9PM	Stesen Pas
FONDE Moring	6AM Stesen Op - Nius Heltain - Musik na ol intaviu
6.30AM	Nius na Karent Afes
7AM	Stesen Pas
Nait	7PM Stesen Op
7.01PM	Oi Heltain na Program Priviu
7.15PM	Musik na Chit-Chat
7.30PM	Nius na Karen Afeas
8PM	Youth
8.15PM	Musik/Spots
8.30PM	NIUS
8.40PM	Focus Riplei
8.55PM	Musik
9PM	Stesen Pas
FRAIDE Moring	6AM Stesen Op - Nius Heltain - Musik na ol intaviu
6.30AM	Nius na Karent Afes
7AM	Stesen Pas
Nait	7PM Stesen Op
7.01PM	Oi Heltain na Program Priviu
7.15PM	Musik na Chit-Chat
7.30PM	Nius na Karen Afeas
8PM	Wantok
8.15PM	Musik
8.30PM	NIUS
8.40PM	Youth Riplei
8.55PM	Musik
9PM	Stesen Pas
SARERE Nait	7PM Stesen op - Oi Nius Heltain/Program Priviu
7.05PM	Musik na Chit Chat
7.30PM	Nius
7.40PM	Wantok
8PM	Lokal Ben
8.30PM	Nius
8.40PM	Musik/Chit Chat
9PM	Stesen Pas
SANDE Nait	7PM Stesen op - Oi Nius Heltain/Program Priviu
7.05PM	Musik na Chit Chat
7.30PM	Nius
7.40PM	Femil Blong Serah (Radio Plei)
8PM	Lukluk Bek Long Wik
8.30PM	Nius
8.40PM	Musik/Chit Chat
9PM	Stesen Pas

PACIFIC BEAT

Ol lida i no amamas long Australia i agensim wok program bilong Pasifik long pinis bilong Forum

LONG pinis bilong bikpela Pasifik Allans Forum bung, ol lida bilong Pasifik i tokaut olsem ol i no amamas long bekim bilong John Howard long larim ol sisenol wok manmeri long go wok long Australia.

Husat i askim: Graeme Dobell Husat i bekim: John Howard, Praim Minista bilong Australia, Laisenia Qarase, Praim Minista bilong Fiji, Sir Michael Somare, Praim Minista bilong Papua Niugini, Jose Ramos Horta, Foren Minista bilong Is Timo.



QARASE: Mipela long Pasifik i no amamas long bekim bilong Australia. *Ol Foto: Neville Choi*

Mista Howard long dispela hevi. Praim Minista bilong Fiji, Laisenia Qarase, i bihainim toktok bilong PNG, long tok olsem Australia i mas soim wankain pasin long ol manmeri bilong Pasifik, olsem ol i soim long ol arapela kantri.

QARASE: Mi na ol wanwok bilong mi i no amamas, bilong wanem yumi save toktok long dispela hevi planti taim, na yumi no save kisim gutpela bekim. Tasol, bekim yumi kisim aste, i no gutpela. Yumi save olsem Australia na Niu Silan i laikim tru ol sisenol wok. Yumi save tu olsem dispela tupela kantri, i larim ol manmeri husat i nogat wok pemit long wok long ol fam. Olsem na askim bilong mipela i gutpela moa, bilong wanem askim bilong mipela i gat ol long behainim na tu i gat gutpela monitari sistem.

DOBELL: Stetmen long dispela samit i tok olsem, forum



HORTA: Jose Ramos Horta, Foren Minista bilong Is Timo i bin kamap long Pasifik Ailans Forum. Em i no bin wanbel long Mista Howard i werim spot siot long taim bilong bikpela kibung.

bai go het long wok i go long agimen we i toktok long treid namel long Australia na Pasifik. Long sait bilong ol manmeri long go kam long wok long Australia, bai wanpela bilong ol toktok we i bai kamap long agrimen.

Siaman bilong dispela kibung, Si Micheal Somare bilong Papua Niugini, i tok em bai kamapim dispela toktok gen long samit bilong neks yia, long Tonga.

SOMARE: Mista Howard i tingting planti tasol long imigresen polisi bilong kantri bilong em. Gavaman bilong wan wan kantri i gat lo bilong ol yet long imigresen. Olsem mi tok pinis, dispela toktok i stap long het toktok bilong agenda bilong neks yia na mipela bai toktok gen long en.

DOBELL: Long dispela bung bilong ol bikman, Mista Howard i werim wanpela spots siot we ol lida i bin werim long

wanpela malolo long Madang, na i go long las sesen bilong dispela bung.

Long wankain taim ol arapela lida i bin werim kot na pasim nektai na kamap long kibung.

Mista Howard i stap long pes 20-pela minit bilong kibung na bihain i lusim na go. Em i no stap long harim dispela tokok we i kam long Foren minista bilong Is Timo, Jose Ramos Horta. Ating sapos, Praim Minista Howard i harim, em bai sem.

HORTA: Ating em i lusim dispela kibung, bilong wanem em i ting olsem mi bai toktok gut long em na (em i lap)

DOBELL: taim Mista Howard i kam bek, em i no mo werim, spots siot bilong em. Dispela taim em i werim, long slip siot, cot na nektai bilong em, we i soim olsem, kain ol siot olsem i ken karim sem i kam long yu yet.

Pacific BEAT Listen to Radio Australia 101.9FM Port Moresby

4, 5, 6am & 4pm, 5pm including sport

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.



HUSAT LAIK KISIM: Credit Corporation Sauten Traders pilaia i kalap na kisim bal long lain aut na lukluk long ol pilaia long husat em bai givim bal long em long taim ol i pilaim Supa 4 failol wantaim Besta Noten Reds, Bava Pak las Sarere. Reds win 22-18 tasol Traders i kisim kap.



I KAM: Kain was i save mekim Wantok tim i pilai gut we ol i bin winim prisisen Nancy Kamara Kap long Pot Mosbi softball meri pilai tupela wiken i go pinis. Hia ol i mekim gen wantaim SP tim long namba wan propa sisen pilai long Bisini Daimon las Sarere.



BILONG MI: Bismark pilaia (han kais) i traim long pasim Sunam pilaia long Pot Mosbi hoki gren fainol long Sir John Guise Stedum long las Sande. Bismark win 1-0.



NOKEN: Pilaia bilong Courts i no laik bai birua bilong em i skoa long stat bilong Pot Mosbi Praivet Kampani netbol kompetisen long las Sande.



KISIM TAIM: Borders Sharks pilaia i kisim taim nogut long han bilong JV Bulldogs long Ward 78 ov sisen ragbi lig resis long Hohola tupela wiken i go pinis. Ol strongpela pilai i save kamap.



KLIA: Pilaia bilong Nen Konok i redi long pairapim bal i go longwe long maus bilong gol pos bilong ol na i tokim wan pilaia long klia taim ol i pilaim Wasu Crabs long Evedahana soka resis.

**LAE
BISCUIT CO.**



WANTOK

SPORTS

**LAE
BISCUIT CO.**



**Melbon Kap wina- Makybe Diva
Lukim stori long pes 29**

Melb.

**Insait:
PNG Swima
Pes - 30**

**Ipatas Kap
Pes - 31**

PLET BILONG KAIKAI
3kg, 6kg, 8kg, 10kg
na 15kg istap

PLET BILONG WARA
3lt, 5lt, 6.5lt na
10litre istap

Mipela igat kaikai
bilong kakaruk;
Starter, Grower na Finisher
istap long 40kg, 20kg, 10kg na
liklik 4kg paket

Sapotim wok didiman long yumi

Brian Bell
Shop with a friend